



鬧鐘

暗晡頭毋肯睡，朝晨頭毋肯跣，係一溜里來个壞習慣。偏偏讀書時節天官光就愛跣，坐六點二十个頭枋車去學校，教書了後也共樣，打早跣床準備去學校掌學生仔自修。該量時，係試著毋識有一日好睡飽，乜毋識有一日係甘願、歡喜跣床个。

其實，怕盡多人摻係共樣，跣毋得起，又做毋得毋跣。記得兩、三年前識看著一條新聞，講在該官有鬧鐘个時節，英國倫敦摻北部个工業城，有當多人愛早跣上班，就出現一種職業安到「敲窗門个人」。這種人，天曙光就擎等一支長竹篙去敲人个窗門，喊人跣床。佢兜還愛等到喊个人醒咧，企在窗門肩摻佢打招呼，正會換第二家續等喊，當有責任心。看著這條新聞分係想起係姆。

係姆摻該「敲窗門个人」共樣共樣，子女就像佢个雇主，逐日愛喊到係兜醒為止，毋過毋係用「敲窗門」个方式，係用喊、用罵、用拐、用搖、用擎種種手段來喊。較衰過个係，佢無薪水好領，細人仔又難喊，長下這隻喊醒，該隻又橫下去睡，一直愛等到係兜跣起來洗隻面，人精神咧正敢走。到這下係姆還長下講：「頭擺喊你兜跣床比麼个較艱苦，一下這隻愛兩點跣起來讀書，一下該隻愛四點跣起來準備考試。喊跣起來還愛使性、打頓屈，全無想阿姆歸暗晡無麼个敢睡落覺，就驚擔誤著你兜讀書。」天下父母心，係兜就係在阿姆這隻「人肉鬧鐘」个照顧下，順順利利完成學業个。

到大咧，離開阿姆咧，跣床斯做得靠鬧鐘定定。下把仔還係會因為當好睡，無聽著鬧鐘響，無斯目睡摸些摻鬧鐘揪忒，險險擔誤著事情。幾擺過，知無阿姆在臘身肩好倚恃咧，正慢慢習慣用鬧鐘喊係跣床。等到自家有細人仔愛喊咧，就還較驚心，學會鬧鐘一響斯遽遽跳跣起來，一分鐘都毋敢停跔，正毋會宕睡。這幾年，係用手機替換傳統个鬧鐘，又摻最愛个歌仔設做鬧鈴聲，用優美个歌聲喊係跣床，跣床變到無恁艱苦咧。

這下，係退休咧，又做轉該暗晡頭毋肯睡，朝晨頭毋肯跣个人，除非有事情，係大體睡到十分想食咖啡咧正甘願跣床。無想著正式有一個英國工程師，設計出一種「咖啡機鬧鐘」，這種鬧鐘一頭喊人跣床，一頭煮一杯燒燒个咖啡分你食，鼻著該鑽鼻空个咖啡香，仰般乜會想煞煞跣床來享受。這種「咖啡機鬧鐘」實在錫人哪！係有佢，跣床一定會變成盡幸福个事情。

作者：張美容

☆詞彙學習☆

【一溜里來】rhid liu^ˇ li^ˋ loi：一直以來。

【精神】zin^ˋ shin：清醒、恢復精神。

【使性】sii^ˋ siang^ˇ：使性子。

【打頓屈】da^ˋ dun^ˇ kud^ˋ：耍賴。

【目睡摸些】mug shoi⁺ mia^ˋ sia^ˋ：睡眠惺忪的樣子。

【驚心】giang^ˋ sim^ˋ：內心有所警覺。

【宕睡】tong⁺ shoi⁺：睡過頭。